

PICING CHRISTIAN

Upna i cih in honpa le gumpa ahi Christu Jesu sungah nuntak na thak ahihi (Mk 16:16). Gumpa ahi Christu Topa ii deihna banga “gamtatna omlo upna in, asi ahihi (James 2:17). Bang hanghiam cih leh Dawi te nangawnin upna nei-in, Pasian kihta in ling uha (James 2:19), ahi zongin nuntak tawntungna ahi Pasian gam nangahkha lo uhhi. Tua hi a, upna in gamtatna hangin nungta in, khangcinga, upna neimi te Christu sungah api cingdingin nisim naisim in honglam toto ahihi. Gamtatna i cih ciangin, “Vantunga om ka Pa deihna banga agamta mite in, Pasian tanu/pa za ngah ding’(Mk 3: 35) ci ahih manin, Pasian deihna tawh kituak ahoih apha gamtatna khempeuh cihna ahihi. Tua ahoih apha, Pasian deihna tawh kituak gamtat na i neihzawh nadingin, itna bekin hong gualzosak ahih manin, Paul in, “Nangmah na ki-it mah bangin, nalawmte na it in cih thukham zuihna in, thukham khempeuh azuikhin hi” (Gal 5:14) na ci hi.

Misiangtho James in zong, “Nangmah na ki-it mah bang in, mi dangte na it in cih thukham i zuih leh, thukham om khempeuh azuikhin i suak hi” (James 2:8) na cilai hi. Topa Jesu in, Laisiangtho sungah, “Pasian thuza a, Pasian deihna banga agamta mi in, thupha ngahmi ahihi” (Lk 11:28) ci-in honghilh hi. Pasian deihna leh ama hong vaikhak Kammal (Thu) in, “Na Topa Pasian, nalungsim khempeuh, na hatna khempeuh, na pilna khempeuh tawh na it in. Nangmah na ki-it mah bangin, midangte na it in,” (Lk 10:27)cih ahihi. Hih thukham ombanga agamta te, hih thukham azuite in nuntak tawntungna ngahding hi (Lk 10:28) ci-in hongkamciam hi.

Christian upna in, Pasian deihna banga zuihna ahi - gamtatna tawh kikhen khia leh tua upna in asi taktak hiding hi. “Kha tawh aki gawmlo pumpi in asi ahih mahbangin, gamtat na tawh anungta lo, gamtatna ii zuihloh upna in zong asi ahihi (James 2:26). Tua hi leh, bangci bang upna in eite adingin upna man le nuntakna hongpia upna hi dinghiam? Misiangtho

Paul in, “Itna hangtawh akipuahpha tawntung upna bekin, nuntakna hongpia hi,” (Gal 5:6) ci-in honghilh hi. Tua ahih manin, upna in itna hangin khangcin theihna’ng hunhoih le khuan ngaha, tua itna in nisim nuntakna ah hongmapi, hong makaih, nisim i gamtatna te ah, nekna dawnna, ciahna kuanna, zinna vakna, zonna vaina, lupna thawhna cih te khempeuh ah, Pasion deih na banga i gamtat zawhna’ng tha hongpia den ahihi. Itna in gamtatna ahihi. Itna hangin itna kammal, itna gamtat, itna thu, itna la, itna annkuang, itna zuhai te hong piangkha ahihi. Tuat in itna hanga hongpiang gamtatna vive ahihi. Tua hi leh, “Pasion in ki-it na hi” (1John 4:8) ci ahih manin, Pasion sung ah Upna i cih in upna gamtatna cileng alungkimlo kuamah i om kei ding hi. Atom in cileng, upna in itna hangin nungta a, itna in gamtatna ahih manin, upna in gamtatna ahi hi. Nisim i gamtat na khempeuh in, upna pan ahong luangkha itna gamtat na hongsuak hi.

“Upna hangin na lamdang tampi takte semkhia in, vangliatna lianpipi te i lakphial ahi zongin, Pasion deihna banga gamtatna ahi nuntakzia te i neih keileh, eite honpa le gumpa ahi Topa in, “Note kongthei ngeikei hi. Mawhna abawl mite aw, kakiangpan paikhia un,” (Mt 7: 21-23) hongci dinghi. Tua hi a, apicing Christian upna in, gamtatna tawh anungta, gamtatna tawh akhangto, gamtatna tawh aki mukhia thei, gamtatna tawh akilakkhia upna ahi hi. Tua upna anei Christian te ihih manin, lungdam in Topa i phat hi. Amen.